



**Dominggo sa Pentekostes –
Ang Pagkunsad sa Espiritu Santo
Hunyo 8, 2014**

**Ma-Dominggong Tamdanang Liturhikal alang sa
Simbahan sa Kabus sa Diwa sa Bag-ong Ebanghelisasyon**

Ang Simbahan sa Kabus, pinaagi sa Gagmayng Simbahanong Katilingban, puno sa Espiritu, makasaksi sa Espiritu nga anaa na sa mga kabus kon iyang ipadayag ang Ebanghelyo pinaagi sa pag-inambitay sa kinabuhi uban sa tanang kanasuran, tanang katawhan, tanang tinohoan ug pilosopiya, tanang kultura!

Uban sa malipayong mga kasingkasing, mapasalamaton tang saulogon ang Dominggo sa Pentekostes: ang pagkunsad sa Espiritu Santo, ang pagkahimugso sa Simbahan. Uban ni Maria, sa mga apostoles ug sa mga disipulo, atong pamalandongan ang “katingalahang mga buhat sa Ginoo ug mag-ampo kita nga ang mga buhat sa Espiritu Santo mahimong tataw unta kaayo sa kalibutan” (Ordo 2014, alang sa mga Diyosesis sa Pilipinas). Buhaton nato kini uban sa paghinuktok sa panahon sa Simbahan. Matud pa sa PKP-II:

“5. Ang Kasamtangang Panahon: Ang Panahon sa Simbahan

(44) Nanagpuyo kita karon sa kasamtangang panahon sa Gingharian nga miabot na ug sa Gingharian nga hingpiton pa. Mao kini ang panahon sa misyon sa mga sumusunod sa Ginoo.

(45) Sa iyang kinabuhing publiko, gitawag ni Jesus alirong kaniya ang mga disipulo aron mosunod kaniya ug moambit sa iyang kinabuhi. Gihagit niya sila: ‘Kinsa gani kadtong buot mosunod kanako kinahanglan nga molimod sa iyang kaugalingon, mopas-an sa iyang krus ug mosunod kanako.’ Ilang pagasundon dili lamang ang iyang mga gitudlo kon dili siya gayod. Kinahanglang andam sila sa pag-ambit sa iyang kinabuhi ug padulngan.

(46) Gihulma niya silang usa ka pundok, ang

RITO SA PAGSUGOD

P: Sa ngalan sa Amahan ug sa Anak ug sa Espiritu Santo.

K: Amen.

P: Ang Amahan nga mabubuhay, ang Anak nga manluluwas ug ang Espiritu Santo nga tig-balaan ug tig-lig-on maanaa kaninyo.

K: Maanaa usab kanimo.

pinakalawom nga sirkulo iyang gitawag: ang Napulog Duha. Ngadto kanila iyang gipadayag ang mga misterio sa Gingharian sa Diyos. Gitudlo niya kanila nga ang tinagoan bahin sa pagkabanggiitan sulod sa Gingharian anaa man sa daw-binatang pagsalig sa Diyos ug sa mapahiubsanong pag-alagad. Gipadala niya sila alang sa sa usa ka tahas ngadto sa mga kabaryohan ug kalungsuran sa Israel.

(47) Gipaalirong niya sila kaniya sa panihapon sa gabiing siya gibudhian, gitugyan niya kanila ang iyang kaugalingong lawas ug dugo isip kalig-onan sa bag-ong kasabutan, ug iya silang gimandoan nga maghinigumaay sama sa iyang paghigugma kanila. Nagkatibulaag sila sa panahon sa iyang pagpasakit ug kamatayon, ug nagpundok na usab sila human sa iyang pagkabanhaw gikan sa mga minatay. Gipiyl niya kanila ang usa ka tinong misyon isip iyang mga tinugyanan, aron himoong mga tinun-an ang tanang kanasuran nga ilang pagatudloan sa pagsunod sa iyang mga sugo. Iyang gipadala ang Espiritu Santo ngadto sa mga tinun-an sa panahon sa Pentekostes. Sinul-oban sa gahom gikan sa kahitas-an pinaagi sa pagkunsad sa Espiritu Santo, uban sa pinakalig-ong kadasig ug balaang kaikag nanglakaw sila aron pagsangyaw sa Nindot nga Balita, sa gugma ni Jesus nga gipatay ug nabanhaw aron ang tanan mabuhi.”

Nagaambit ug nagasalmot ang atong GSK sa kinabuhi ug misyon sa Simbahan. Ang atong kinabuhi karon sa sulod sa Simbahan, diha sa GSK, maoy kinabuhi sa kasamtangang panahon: tunga-tunga sa pagsugod sa Gingharian ug sa umaabot ng kahingpitan niini. Aron paghatag ug mas konkretong sukaranan niining maong atong kinabuhi ug tahas karon, maayo tingali nga atong pamalandongan gayod ang mga nahasulat sa mga paragrapo sa itaas, sa paaging hinayhinay ug matitud-anon. ■

Pasiuna ug Pag-abi-abi

Mga minahal kong mga igsoon: ipadayon nato ang pagsaulog sa atong kinabuhi nga malipayon ug mapasalamaton isip Simbahan, isip katilingban sa katawhan sa Diyos. Gitapok kita sa Espiritu Santo isip mga bag-ong binuhat ug gitultolan kita niya sa halawom nga pagpakigsuod sa misterio sa Diyos ug sa iyang Gingharian. Uban ni Maria, sa mga apóstoles ug sa mga disipulo, ato karong pamalandongan ‘ang mga katingalahang buhat sa Diyos, ug mag-ampo kita nga ang mga buhat sa Espiritu Santo mahimong mas tataw unta sa kalibutan’ sa atong panahon.

Akto sa Paghinulsol

P: Mga igsoon, ato pangayoon karon sa Diyos ang iyang pasaylo sa atong mga sala, aron mahimo kitang takus sa pagsaulog niining mga balaang misteryo.

P: Nagakumpisal ako...

K: Sa Diyos makagagahum sa tanan

Nga inyo unta akong iampo sa Ginoo nga atong Diyos. Amen.

P: Kaloy-an unta kita sa Dios...ngadto sa kinabuhing walay katapusan.

K: Amen.

P: Ginoo, kaloy-i kami.

K: Ginoo, kaloy-i kami.

P: Kristo, kaloy-i kami.

K: Kristo, kaloy-i kami.

P: Ginoo, kaloy-i kami.

K: Ginoo, kaloy-i kami.

Himaya sa Diyos didto sa langit...

Kolekta

P: Mag-ampo kita: O Diyos, kinsa pinaagi sa misterio niining dakong pangilin karon nagabalaan sa imong tibook Simbahan sa matag katawhan ug nasud, ibubo, nangaliyopo kami kanimo, ang mga gasa sa Espiritu Santo latas sa nawong sa kalibutan ug, uban sa grasyang langitnon nga naglihok sa unang panahon kanus-a gisangyaw ang ebanghelyo, pun-a sa makausa pa ang mga kasingkasing sa mga

magtotoo. Pinaagi sa among Ginoong Jesukristo, imong Anak, nga buhi ug hari uban Kanimo diha sa kahiusahan sa Espiritu Santo, Dios nga usa, hangtud sa kahangturan.

K: Amen.

LITURHIYA SA PULONG

Unang Pagbasa: Buhat 2:1-11

L: Ang pagbasa gikan sa Mga Buhat sa mga Apostoles.

(Basahon gikan sa Kasulatan)

L: Ang Pulong sa Ginoo.

K: Salamat sa Dios.

Komentaryo sa Buhat 2:1-11:

Mao kini ang nahaunang duha ka yugto sa upat ka yugto sa asoy bahin sa pagkunsad sa Espiritu Santo sumala ni Lukas. Ang unang yugto mao ang pagkunsad sa Espiritu Santo ug ang iyang igo sa katilingban sa mga disipulo. Sunod mao ang igo niini ngadto sa mga katawhang nagkatipon ug nakadungog sa mga apóstoles nga misulti sa ilang nagkadaiyang kaugalingong mga pinulungan. Ang ikatulo mao ang hataas nga pagtestigo ni Pedro nga mibunga hinoon sa pagpabunyag sa mga 3 ka libo ka tawo. Ang kinaulahian mao ang pagkabag-o sa pamaagi sa pagkinabuhi sa unang Kristohanong katilingban: ang kinabuhing komunal.

Sa iyang paghisgot sa Pentekostes, gilugar ni Lukas ang panahon sa pagkunsad sa Espiritu Santo sa adlawng naghinumdom sa Kasabotan tali sa Diyos ug sa mga Judiyo didto sa Bukid sa Sinai – sa panumdumang Judiyo, ang adlaw nga nagtapos sa 7-ka semanang kasaulugan human sa Pasko. Daw naghimo usab si Lukas ug usa ka awdiyo-bisuwal nga pagpadayag ginamit ang mga talan-awon sa Karaang Testamento aron ihulagway ang misterio: ang hangin/espíritu miabot nga kusog ug minglanog ug mipuno sa tibook balay

unya mikunsad ang mga dila sa kalayo sa matag tawo nga atua didto. Ang mensahe: ang pagkunsad sa Espiritu Santo mao ang pag-abot sa bag-ong panahon sa Kasabotan tali sa Diyos ug sa tanang katawhan sa yuta. Ang sunod nga yugto naghulagway sa mga apóstoles nga, takulahaw lamang, didto na sa gawas, uban sa nagkasari-saring mga tawo sa lain-laing kultura nga nakadungog kanila nga nagsulti sa ilang kaugalingong pinulungan. Ang mensahe: ang ebanghelyo abli ug kinahanglang isangyaw nga dayag ug tataw sa tanang kanasuran, tanang katawhan, tanang kultura.

Salmo Responsoryo: Sal 104:1, 24, 29-30, 31, 34

(Basahon gikan sa Kasulatan)

Komentaryo sa Sal 104:

Awit kini pahinungod sa Magbubuhat: ang tanang butang nga iyang gimugna maanindot. Silang tanan iya sa Ginoo. Ang Ginoo ang sinugdanan sa kinabuhi. Ang iyang espíritu nagmugna ug nagbag-o kanila.

Ikaduhang Pagbasa: 1 Kor 12:3b-7, 12-13

L: Ang pagbasa gikan sa Unang Sulat ni San Pablo sa mga taga-Korinto.

(Basahon gikan sa Kasulatan)

L: Ang Pulong sa Ginoo.

K: *Salamat sa Dios.*

Komentaryo sa 1 Kor 12:3b-7, 12-13:

Gipakita ni Pablo ang kalainan tali sa mga gasa sa Espiritu alang sa Kristohanong katilingban nga mao ang “Lawas ni Kristo” ug sa mga gasa sa laing espíritu nga iya sa katilingban sa Korinto: ang espíritu sa pag-inindigay, sa pagselos, ug pagbahin-bahin. Sa Kristohanong katilingban – ang Lawas ni Kristo – walay luna ang pag-inindigay,

ang selos ug ang pagbahin-bahin bisan tuod kon kini may impluwensya sa mga Kristyano sa ilang madasigon ug puno sa diwang mga papel, buluhaton ug nagkalainlaing tahas sulod sa katilingban. Buot santa-on ni Pablo ang mapasiatabong pagpangulo nga kasagarang mopahilom ug mopihig sa mga kabus. Tungod kay ang mga kabus mismo gitugahan man sa Espiritu, dan, sa tumang pagka-angay, sila usab kinahanglang paminawon ug paapilon sa mga buluhaton sa nagkadaiyang mga gamit sa mga bahin sa katilingban. Ila gayong huptan nga silang tanan tipik sa kinatibuk-an: ang buhing Lawas ni Kristo, gipakatakus ug gihatagan ug gahom aron buhaton ang ilang mga isigka-papel, buluhaton ug tahas pinaagi sa usa ka Espiritu Santo lamang.

Sekwensya: Dali Na, O Espiritu Santo
(pagabasahon gikan sa tamdanan)

Berso sa Aleluya:

T: **Aleluya, aleluya.** Dali na, O Espiritu Santo, pun-a ang mga kasingkasing sa mga nagtoo ug padilaaba diha kanila ang kalayo sa imong gugma!

T: **Aleluya, aleluya.**

Ebanghelyo: Juan 20:19-23

P: Ang Ginoo maanaa kaninyo.

K: *Maanaa usab kanimo.*

P: Ang Santos nga Ebanghelyo Sumala ni San Juan.

K: *Himayaon ikaw, O Ginoo.*

(Basahon gikan sa Kasulatan)

P: Ang Ebanghelyo sa Ginoo.

K: *Daygon Ikaw, O Kristo.*

Komentaryo sa Juan 20:19-23:

Usa kini sa upat ka mga pagpakita ni Jesus human sa iyang pagkabanhaw, sumala sa Ebanghelyo ni Juan. Dinhi, gipakita una ni Juan ang bahin sa panahon: “sa gabii sa unang adlaw sa semana”, ug dayon ang bahin sa

espasyo: “gitrangkahan ang mga pultahan diin nagatapok ang mga disipulo”. Human niini, iyang gisunod ang bahin sa tawhanong sikolohiya o panahom: “tungod sa kahadlok nila sa mga Judiyo”. Busa, dinhi makita nato ang eksenang adunay tulo ka dimensyon. Dinhi niining kasinatian material nga adunay tulo ka dimensyon nahitabo ang pagkukulukabildo ni Jesus ug sa iyang mga disipulo. Sa pagpakita ni Jesus sa iyang mga samad sa mga kamot ug kilid, iyang gipaila ang iyang tawhanong identidad nga gisakit ug gipatay. Nagdala kini’g kalipay ngadto sa mga disipulo. Apan pinaagi sa pagtimbaya sa kalinaw gikan sa Nabanhawng Ginoo ug sa paglakbit-hisgot sa Amahan ug sa gasa sa Espiritu Santo, ang ika-upat nga dimensyon gidugang: ang pag-apil sa langit sa misyon sa pagpasaylo sa mga tawo sa yuta.

Tungod sa gasa sa Espiritu Santo nganhi sa kalibutan, ang tanang binuhat karon nalapsan na sa presensya sa Nabanhawng Jesus. Busa wala na gayo’y kinabuhi ni butang nga maingon tang sirado ug dili abli sa malapasong presensya sa Espiritu. Niini nga diwa, ang pagkunsad sa Espiritu Santo nagbag-o sa tanang butang, ug, pinaagi sa pagtoo, naghimo kanatong bag-ong mga binuhat nga nakaambit na sa pagka-diyos sa Anak. Tungod niin, ang pagtoo kang Jesus ug ang paghupot sa iyang mga baruganan mahimo gayod, pinaagi sa pagsaksi sa mga tumutoo, sa Simbahan ug sa nahasulat nga pulong, ang Ebanghelyo, ang Pulong sa Ginoo.

Ubani si Fr. Ben Alforque, MSC sa Missionaries of the Sacred Heart sa iyang **GOSPEL BREAK**, hamubo apan makalingaw nga video mahitungad sa Ebanghelyo karong Dominggo. Bisitaha ang gospelbreak.wordpress.com. o pinagi sa inyong smartphone o tablet i-swipe kini nga QR code.



Wali: Ang Simbahan sa Kabus, pinaagi sa Gagmayng Simbahanong Katilingban, puno sa Espiritu, makasaksi sa Espiritu nga anaa na sa mga kabus kon iyang ipadayag ang Ebanghelyo pinaagi sa pag-inambitay sa kinabuhi uban sa tanang kanasuran, tanang katawhan, tanang tinohoan ug pilosopiya, tanang kultura!

Sumadang Mensahe sa mga Pagbasa sa Dominggo	Ang Simbahan sa Kabus: Konkretong Hulagway sa kabus ug sa ilang kahintang	Mga Puntos para sa Pamalandong/ Panawagan/ Hagit
<p>Ang Simbahan sa Kabus, pinaagi sa Gagmayng Simbahanong Katilingban, puno sa Espiritu, makasaksi sa Espiritu nga anaa na sa mga kabus kon iyang ipadayag ang Ebanghelyo pinaagi sa pag-inambitay sa kinabuhi uban sa tanang kanasuran, tanang katawhan, tanang tinohoan ug pilosopiya, tanang kultura!</p>	<p>Isip GSK, unsa may inyong mga kasinatian nga inyong gito-hoan nga diha ang Espiritu Santo, buhi ug naglihok? Ang inyong GSK ba, ug mga serbisyo niini, adunay pagpihig ug ubos nga pagtagad sa mga babaye, sa mga bayot nga lalaki ug babaye, sa mga nag-ilis ug genero, sa mga dili-puti ug pamanit, sa mga adunay apan sa lawas, sa mga Radikal, sa mga tawo nga laig tinoohan, sa mga walay pagtoo ug sa mga kabus?</p>	<p>Sa pagkunsad sa Espiritu Santo nga milapos sa tanang binuhat, nagsugod ang usa ka bag-ong pagmugna uban sa bag-ong pamaagi sa pagkinabuhi. Bag-ong mga binuhat ug bag-ong kinabuhi sa gugma, sa kagawasan, ug sa pag-inambitay sa tanang butang nga komun isip usa ka bag-ong pamaagi sa pag-atiman sa mata’g-usa isip mga managsoon.</p>

Padayag sa Pagtoo

P: Nagatoo ako...

K: ...Sa Dios ang Amahan ang makagagahum sa tanan, Magbubuhay sa langit ug yuta; nagatoo ako kang Jesukristo, ang Iyang bugtong Anak, atong Ginoo. Gipanamkon Siya sa lalang sa Espiritu Santo, (*Moyukbo ang tanan*) ug natawo gikan ni Maria nga Ulay. Nag-antos Siya sa sugo ni Poncio Pilato, gilansang sa krus, namatay ug gilubong. Miadto Siya sa mga nangamatay. Sa ikatulong adlaw nabanhaw Siya. Misaka Siya sa langit ug nagalingkod sa too sa Dios, ang Amahan, ang makagagahum sa tanan. Mobalik Siya aron paghukom sa mga buhi ug sa mga minatay. Nagatoo usab ako sa Espiritu Santo, sa santos ug Katoliko nga Simbahan, sa pagpasaylo sa mga sala, sa pagkabanhaw sa lawas, ug sa kinabuhing walay katapusan. Amen.

Mga Katilingbanong Pag-ampo

P: Mga hinigugma kong mga igsoon, mapahiubsanon kitang mohangyo sa Amahan sa mga grasya nga atong gikinahanglan aron mabati nato ang presensya sa Espiritu Santo uban kanato, ug ma-aninaw ang iyang kalihukan ug pagtawag. Sa mata'g pag-ampo, kita motubag: Ginoo, hupnga kami sa imong Espiritu.

T: *Ginoo, hupnga kami sa imong Espiritu.*

L: Mag-ampo kita alang sa Simbahan: nga isip Simbahan sa Kabus sa tibook kalibutan, iya untang ipadayon ang pagpamalandong uban ni Maria, sa mga apostoles ug mga disipulo ug ang pagsangyaw sa “mga katingalahang buhat sa Diyos ug mag-ampo nga ang tanang buhat sa Espiritu Santo mas tataw untang mailhan dinhi sa kalibutan” sa atong panahon. Mag-ampo kita sa Ginoo.

T: *Ginoo, hupnga kami sa imong Espiritu.*

L: Alang sa atong Santo Papa Francisco I, sa mga obispo, pari, diyakono, kanilang nanagpuyo sa kinabuhing konsagrado ug sa tanang gitugyanan sa pag-amoma ug

pagdumala sa Simbahan isip Katawhan sa Dios: nga ila untang ipadayon ang pagsangyaw sa Ebanghelyo pinaagi sa pag-inambitay ug diyalogo sa kinabuhi sulod sa Kristohanong katilingban, uban sa mga tawong lahi ug pagtoo, ideolohiya ug kultura tungod kay ang Espiritu Santo nagpuyo na kanatong tanan sa nagkadaiya ug lainlaing paagi. Mag-ampo kita sa Ginoo.

T: *Ginoo, hupnga kami sa imong Espiritu.*

L: Alang sa mga lideres sa kalibutan ug sa tanang gitugyanan sa pangagamhanan ug pagdumala sa mga butang sa kalibutan: nga ila untang paluyohan ug barugan ang mga hiyas sa solidaridad, ug dili ang pag-inindigay; sa pagpalabi sa kaayohan sa uban ug dili ang pagselos; ug ang bag-ong internasyonal nga panaghiusa taliwala sa pagkalahi ug dili sa nasyonalismonog huot, sa patriotismong wala sa lugar ug sa pagkabahin-bahing bunga sa kawalay pagsuta. Mag-ampo kita sa Ginoo.

T: *Ginoo, hupnga kami sa imong Espiritu.*

L: Alang kanatong tanan, mga lumulupyo sa kalibutan ug sakop sa kalangitan: nga ato untang dasigon ug tabangan ang tagsa-tagsa aron mahikaplagan ug mapalambo ang mga gasa sa Espiritu sama sa gasa sa pagka-apostol, o pagka-propeta, o pagka-magtutudlo, o pagpangulo ug pag-ayo, ug uban pang mga gasa nga nagpatakos sa pagbulahan sa katilingban, ang Lawas ni Kristo. Mag-ampo kita sa Ginoo.

T: *Ginoo, hupnga kami sa imong Espiritu.*

L: Alang sa atong mga minahal sa kinabuhi nga milalin na: nga diha sa kapasayloan sa ilang mga sala, maila na unta ang pahulay nga dayon diha sa kasingkasing sa atong Ginoo ug Manluluwas, si Jesukristo. Mag-ampo kita sa Ginoo.

T: *Ginoo, hupnga kami sa imong Espiritu.*

L: Alang sa atong mga espesyal nga mga

tinguha, sa kahilom sa atong tagsa-tagsa ka kasing-kasing, (*mohilum kadiyot*)
Mag-ampo kita sa Ginoo.

T: Ginoo, hupnga kami sa imong Espiritu.

P: Ginoo, mao kini ang mga pag-ampo nga among gihalad kanimo karon. Nangaliyopo kami nga imo kaming tabangan sa pag-aninaw sa presensya, kalihukan ug tawag sa Espiritu nga uban na kanamo sa among panahon. Himoa kaming masinugtanong instrumento sa imong gugma ug pag-amoma sa tagsa-tagsa ug sa tanang mga binuhat. Kini among gipangayo pinaagi ni Kristo atong Ginoo.

T: Amen.

LITURHIYA SA EUKARISTIYA

Paghalad sa mga Gasa

P: Dayegon ikaw, Ginoong Dios sa tanang kalibutan, kay gikan sa imong kamanggihatagon nadawat namo kining among gihalad kanimo, ang pan nga abut sa yuta ug ginama sa kamot sa mga tawo. Mahimo kini nga kalan-on sa kinabuhi alang kanamo.

K: Daygon ang Dios hangtod sa kahangturan.

P: Dayegon ikaw, Ginoong Dios sa tanang kalibutan, kay gikan sa imong kamanggihatagon nadawat namo kining among gihalad kanimo, ang bino nga abut sa yuta ug ginama sa kamot sa mga tawo. Mahimo kini nga ilimnon nga espirituhanon alang kanamo.

K: Daygon ang Dios hangtod sa kahangturan.

P: Mga igsoon, pag-ampo kamo, aron ang ako ug ang inyong sakripisyo dawaton unta sa Dios nga Amahan, makagagahom sa tanan.

K: Dawaton unta sa Ginoo ang sakripisyo gikan sa imong mga kamot; alang sa pagdayeg ug paghimaya sa iyang ngalan, alang usab sa atong kapuslanan ug sa tibuok niyang santos nga Simbahan.

Pag-ampo Alang sa Mga Halad

P: Ihatag, naga-ampo kami, O Ginoo, nga, sumala sa saad sa imong Anak, ipadayag

unta sa Espiritu Santo nganhi kanamo sa mas abundang pamaagi ang mga tinagong misteryo niniing sakripisyo. Pinaagi ni Kristo among Ginoo.

K: Amen.

Prepasyo

P: Ang Ginoo maanaa kaninyo.

K: Maanaa usab kanimo.

P: Ibayaw ang inyong mga kasingkasing.

K: Amo nang gibayaw ngadto sa Ginoo.

P: Magpasalamat kita sa Ginoong atong Dios.

K: Angay ug matarong.

P: Angay ug matarung gayud, sibo ug makaluwas, kanunay ug sa tanang dapit nga magpasalamat kami kanimo, Ginoo, santos nga Amahan, labawng makagagahom ug walay-kinutubang Diyos.

Kay, sa paghatud sa Imong Misteryo Paskuwal ngadto sa kahingpitan, imong gituga karon ang Espiritu Santo ngadto kanilang imong mga anak nga sinagop pinaagi sa paghiusa kanila sa Bugtong mong Anak. Kining mao gihapong Espiritu, sa dihang gihimugso ang Simbahan, ang nag-abli sa kahibalo sa Diyos alang sa tanang katawhan ug iyang gidala ang daghang pinulongan sa yuta sa pagpadayag sa usa lamang ka pagtoo.

Busa, puno sa kalipay sa pasko sa pagkabanhaw, ang mata'g yuta, ang mata'g katawhan nagadayeg sa imong himaya ug bisan gani ang mga gahum sa kalangitan, uban sa mga panon sa mga anghel, nagadungan sa pag-awit sa walay katapusan imno sa imong himaya, sa ilang pag-ingon:

Santos

K: Santos, Santos, Santos nga Ginoo, Dios sa kagahaman. Puno ang langit ug yuta sa imong himaya. Osana sa kahitas-an. Dayegon ang nagaanhi sa

ngalan sa Ginoo. Osana sa kahitas-an.

Pag-ampo sa Eukaristiya

(Human sa konsagrasyon, ang aklamasyon:)

P: Kini ang misteryo sa pagtoo.

K: Among gisangyaw ang imong Kamatayon, O Ginoo, ug among gipadayag ang imong Pagkabanhaw hangtud sa imong pagbalik pag-usab.

(Sa pagtapos sa Pag-ampong Eukaristiko, ang pari moingon:)

P: Pinaagi kaniya, uban kaniya ug diha kaniya, gihatag nganha kanimo makagagahom nga Amahan, diha sa kahiusa sa Espiritu Santo ang tanang dungog ug himaya hangtod sa kahangturan.

K: Amen.

Rito sa Pangalawat

P: Karon mag-ampo kita sa Amahan, atong gamiton ang mga pulong nga gitudlo kanato sa atong Manunubos.

K: Amahan namo, nga anaa sa mga langit, pagdayegon ang imong ngalan, umabot kanamo ang imong ginharian, matuman ang imong pagbuot dinhi sa yuta maingon sa langit. Ang kalan-on namo sa matag adlaw, ihatag kanamo karong adlaw ug pasayloa kami sa among mga sala, ingon nga nagapasaylo kami sa mga nakasala kanamo, ug ayaw itugot nga mahulog kami sa panulay hinonaa luwasa kami sa dautan.

P: Mangayo kami kanimo, Ginoo, nga imo kaming luwason sa tanang dautan. Hatagi kami sa kalinaw niining panahona, aron, tinabangan sa imong kalooy, mahalikay kami kanunay sa sala ug mahilayo sa tanang kasamok, samtang nagapaabot kami nga malaumon sa pagbalik ni JesuKristo, among manunubos.

K: Kay imo man ang gingharian/ ug ang gahom ug ang himaya/ hangtod sa kahangturan.

P: Ginoong JesuKristo, nag-ingon ka sa imong mga Apostoles, “Ang kalinaw ibilin

ko kaninyo, ang akong kalinaw ihatag ko kaninyo.” Ayaw tan-awa ang among mga sala, kondili ang pagsalig sa imong Simbahan ug sibo sa imong kabubut-on hatagi kami sa imong kalinaw ug kahiusa, Ikaw nga buhi ug hari hangtod sa kahangturan.

K: Amen.

P: Ang kalinaw sa Ginoo sa kanunay maanaa kaninyo.

K: Maanaa usab kanimo.

P: Ipakita ta ang atong panag-inigsoonay.

Kordero sa Dios

K: Kordero sa Dios nga nagawatang sa mga sala sa kalibutan, kaloy-i kami. Kordero sa Dios nga nagawagtang sa mga sala sa kalibutan, kaloy-i kami. Kordero sa Dios nga nagawagtang sa mga sala sa kalibutan, hatagi kami sa kalinaw.

Pangalawat

P: Kini mao ang Kordero sa Dios nga nagawagtang sa mga sala sa kalibutan. Bulahan ang gidapit alang sa panihapon sa Ginoo.

K: Ginoo, dili ako angay nga mokalawat kanimo, apan ipamulong lamang ug mamaayo ako.

Pag-ampo Human sa Pangalawat

P: Mag-ampo kita: O Diyos, kinsa nagtuga sa langitnong mga gasa ngadto sa imong Simbahan, panalipdi, naga-ampo kami, ang grasya nga imong gihatag, aron ang mga gasa sa Espiritu Santo nga gibubona kaniya makatipig unta sa tanan niyang gahum ug nga unta kining pagkaong espirituhanon makapadangat kaniya sa bahandi sa kaluwasang dayon. Pinaagi ni Kristo among Ginoo.

K: Amen.

Katapusang Panalangin:

P: Ang Ginoo maanaa kaninyo.

K: Maanaa usab kanimo.

P: Moduko kita ug atong dawaton ang bendisyon sa Ginoo: Hinaut nga ang

Diyos, ang Amahan sa mga kahayag, kinsa nahimuot sa paglamdag sa mga panghunahuna sa mga disipulo pinaagi sa pagbubo sa Espiritu, ang Parakleto, mohatag kaninyo sa kalipay pinaagi sa iyang bendisyon ug maghimo kaninyo kanunay nga buhong sa mga gasa sa mao gihapong Espiritu. Pinaagi ni Kristo among Ginoo.

K: Amen.

P: Hinaut nga ang katingalahang dila sa kalayo nga mipakita sa ulohan sa mga disipulo gamhanan untang molinis sa inyong mga kasingkasing sa mata'g kadautan ug molukop kanila sa iyang makalunsay nga kahayag.

K: Amen.

P: Ug hinaut nga ang Diyos, kinsa nahimuot sa paghiusa sa daghang mga pinulongan ngadto sa usa lamang ka pagtoo, maghimo kaninyong malungtaron diha sa mao ra gihapong pagtoo ug pinaagi sa pagtoo, hinaut maglawig kamo gikan sa paglaum ngadto sa mahayag nga panan-awon.

K: Amen.

P: Ug ang mga panalangin sa labawng makagagahum nga Dios, ang + Amahan ug Anak ug ang Espiritu Santo, mokunsad unta diha kaninyo ug magpabilin diha kaninyo kanunay.

K: Amen.

Pagpanglakaw

P: Panglakaw kamo diha sa kalinaw, ug himayaa ang Ginoo sa inyong kinabuhi. Aleluya, aleluya.

K: *Salamat sa Dios. Aleluya, aleluya.* ■

**Ang Simbahan sa
Kabus, pinaagi sa
Gagmayng
Simbahanong
Katilingban, puno sa
Espiritu, makasaksi
sa Espiritu nga anaa
na sa mga kabus
kon iyang ipadayag
ang Ebanghelyo
pinaagi sa pag-in-
ambitay sa kinabuhi
uban sa tanang
kanasuran, tanang
katawhan, tanang
tinohoan ug
pilosopiya, tanang
kultura!**

Please help us continue publishing
this Missalette with your donation.

Any amount is appreciated
no matter how small.

Thank you!

Account Name:
Communication Foundation for Asia
Metrobank V-Mapa, Sta. Mesa,
Manila Branch:
SA# 3306-509-480
BDO Old Sta. Mesa Road, Manila Branch:
SA# 7090-042-836

Please fax deposit slip to 713-2736
We are located at # 4427 Old Sta. Mesa St.,
Sta. Mesa, Manila